

Azaroak 17: Ikasleen Nazioarteko Eguna

Gaur, azaroak 17, **Ikasleen Nazioarteko Eguna** da. Azken urteotan bezala, Euskadiko Gazteriaren Kontseilutik, ikasle mugimenduak egindako lana azpimarratu eta gizarteratu nahi dugu. Manifestu honen bitartez hurrengo lerroetan jasotzen diren aldarrikapenak gizarteratu nahi ditugu:

- **Ikasle mugimenduen garrantzia**

Ikasleen eskubideak gertutik ezagutu eta defendatzen dituzten eragileak dira. Ezinbestekoa da haien bitartekaritza-lana ikasleonen interes eta beharrak erabakitze-organoetara helarazteko eta hobekuntzarako proposamenak landu eta ekintzak burutzeko. EGK-k UPV/EHurekin duen hitzarmena baliatu du hau azpimarratzeko. Horregatik antolatu du **azaroaren 27an UPV/EHko elkartearen arteko topaketa**, hauek saretu eta sinergiak bilatzeko.

- **Egindako lanaren aitortpena**

Ikasle mugimenduek aktibo jarraitzen dute eta ikasleentzako erreferenteak dira. Hezkuntza ibilbide honetan parte-hartzea sustatzen dute eta garrantzitsua da figura honen aitortpena burutzea eta egiten duten lanari bermea ematea. Era berean, bideak indartu behar dira hauen lanak emaitzak eman eta ikasleen beharrianak asetzeko.

- **Unibertsitate esparrutik haratago**

Gehienetan ikasle elkarteek hitz egiterako orduan unibertsitate esparrua datorkigu burura. Egia da hor jasotzen direla elkarte mugimenduen ordezkaritza gehienak, baina azpimarratu beharra dago bai Bigarren Hezkuntzatik aurrera eta baita Lanbide Heziketako ikastegietan ere aurki daitezkeela inplikatuak dauden ikasle elkarteak.

- **Boluntariotzaren oinarria**

Ikasle elkarteak irabazi asmorik gabeko taldeak dira eta ikasleen eskubideak defendatzea helburu dute. Ikasle mugimenduetan aktiboki inplikatuak dauden gazteek boluntarioki egiten dute lan. Horrek antolaketaarako gaitasuna eta konpromisoa eskatzen du, talde lanean lan egiteko prestutasuna eta ekintzak antolatzeko denbora eskainiz.

Horretaz gain, egun honetan egindako aldarrikapenarekin batera ikasleak horrelako egituretan parte-hartzera animatu nahi ditugu. Hauen bitartez euren eskariak bidera ditzakete nahi dituzten aldaketak sortzeko. Era berean, gazteen interesekin bat datorren egitura aurkitzen ez bada elkarte berri bat sortzeko beldurrik ez izatea.

2018-2019 ikasturtera begira, EGK-k Hezkuntza Formaleko alorrean aurkitzen den **Hezkuntza Foroa** lantaldean parte hartzeko interesa eta nahia izan dezakeen ikasle elkarte, sindikatu, eragile eta gazte orori deia egiten diogu haien proposamenak txertatze aldera eta lantaldearen aniztasuna handitze aldera. Nahi duen orok hezkuntza@egk.org helbidera idatzi edo **94 44 36 143** zenbakira dei dezake.

Hezkuntza Foroan identifikatutako lehentasunen artean, ikasle elkartearen bateratasunean aurrerapausoak ematea da. Antolatutako eragileon artean eskuak elkarri zabaltzea eta gutxieneko adostasunetatik hasita pauso txikiak ematen hastea etorkizunean aldaketa handiak nabarmentzeko.